

往予伯兄尚書奉

詔總修一統志一時博學洽聞之士盡招集邸舍其精
於地志山經水注之書者則若無錫顧景范常熟
黃子鴻太原閻百詩及德清胡朏明皆海內碩儒
傑士卓乎不羣而同在伯兄之門可謂盛矣未幾
伯兄歸田不幸即世諸君子亦雲散而不復合予
被

恩復起仍奉

命卒一統志之役景范已前卒子鴻百詩間一來亦先
後淪沒天下之學者未嘗不歎息咨嗟謂好客如
伯兄今不復有其人而耆德之彫喪不能復聚如

往日殊可惜也予潦倒京華十餘年書今垂成亦已皤然老矣能無感與諸君子各有地誌之書而拙明禹貢錐指獨晚出其書考正孔傳孔疏宋元明諸家之說主以班固地理志參以山海經水經注及郡縣誌摘其謬誤辨其疑似使後世讀經者瞭然心目之間其有功於禹貢不細至發明夏道所陳大義十餘尤足證明孔子無間之言非但區區稽考沿革鉤覈異同資滕口說而已故其書得進呈

御覽一旦邀特達之知而

褒美其耆年篤學良非偶也獨念我

國家繼禹之服聲教四訖遠踰夏后之世使伯兄而
在與肅明輩勒成全書當可追翼禹貢仰副我
皇上崇尚經學之意惜乎伯兄已歿向所謂四君子者
止一肅明在焉予衰老無狀藉手引年以去序肅
明之書不能不三歎於今昔之際也

予告經筵講官內閣學士兼禮部侍郎加一級徐秉義
謹序

卷之三

七

昔鄭漁仲有言禹貢之書深於道者也書深於道非後世言地理者所能及余嘗肆其說以爲自禹治水至今四千餘年地理之書無慮數百家莫有能越禹貢之範圍者亦莫有能疏通證明晰其源流而抉其異同者疇人習於所見學者溺於所聞信乎其難哉德清胡君朏明著禹貢錐指二十卷余受而卒業慨然歎曰偉矣哉此禹貢之功臣也自古著書之難有二一曰博而不擇其失也雜山經地記茫昧而無稽方志輿圖錯迕而失紀太史公周行天下其作河渠書言武帝道河北行二渠復禹舊迹說者以爲與大陸故道不相合何況覲縷掇拾誇多炫奇彼此漫無折衷前後互相衡決此其失

者一也一曰固而鮮通其失也疎川澤之消長不常郡縣之廢置無定或一山而更數名或一水而分數道九河之跡至漢已湮三江之稱訖明未定泥古則廢今信今則疑古此其失者二也莫要於班固之地理志而史家但以爲記載之書不知其條綱正目州次部居約而不失之疎也莫詳於酈道元之水經注而文士但以爲贅蕞之書不知其沿波討瀾窮端竟委瑣而不失之雜也今胡君之書網羅散失摘抉微眇參考故實融貫古今簡要而不疎精詳而不雜兼班志酈注之長而去其二難洵可不出戶庭指畫九州矣昔之釋禹貢者二孔之注疏蔡氏之集傳皆立於學官蔡氏因陋就簡無所

發明僅以資科舉之業而已安國傳頗多抵牾先儒皆以爲魏晉間人依託非西漢筆也是書摘二家之謬不少而採班酈之善爲多至於百家之說折衷紛紜要於一是譬則大川細流支分派別疏而引之使歸墟赴壑而後已不然則猶絕港斷潢之不相通溝澮行潦之無所本方覩經流之大而爽然自失何待望北海若而始回旋其面目哉世儒高談性命忽於實學易不主象占禮不考器數詩不詳鳥獸草木而禹貢一書保殘守缺承訛襲謬者殆千百年得是書而闡發之其有功於經學也大矣君爲人氣專而容寂捷戶著書不接人事蓋有道者也其成是書也研精覃思凡十餘載不惟昌明

地理之學兼亦窺見古聖人財成輔相之精意漁仲所謂深於道殆庶幾焉余用是序而行之質於世之修學好古者康熙壬午日南至

經筵講官戶部尚書吉水李振裕序

處士德清胡渭著禹貢錐指二十卷其書先聖之功臣而後學之津筏也今乙酉首春振裕校書內庭與禁直諸臣從容言

天子崇尚經學搜求遺逸若是書者豈可令伏而不見查學士昇尤重其典核乃以其書奏呈

上覽而善之三月南巡狩駐蹕吳郡渭親齎是書并所撰平成頌一篇恭詣

行宮以獻

上復稱善且令宣至南書房

賜饌

賜御書詩扇及扁額於戲布衣耆艾之士山澤之臞而

上之褒寵備至如是天下之人其有不感激奮發以無負

聖天子獎勸之意者誰也蓋人之著書立說有幸而傳於後者亦有不幸而終不得傳者渭研精覃思凡廿載而成是書書成而遭遇

右文之朝蒙

特達之知爲之表章夫豈獨渭之幸亦是書之實有功於經學而冥冥之中不欲使之棄擲埋沒而不傳也昔鄭漁仲有言禹貢之書深於道者也書深於道非後世言地理者所能及振裕嘗韙其說以爲自禹治水至今四千餘年地理之書無慮數百家

莫有越禹貢之範圍者亦莫有能疏通證明匯其
源流而析其異同者蓋其難有二一曰博而不擇
其失也雜山經地記茫昧而無稽方志輿圖錯迕
而失紀太史公周行天下其作河渠書言武帝導
河北行二渠復禹舊迹說者以爲與大陸故道不
相合何況覲縷掇拾誇多炫奇彼此漫無折衷前
後互相衡決此其難者一也一曰固而鮮通其失
也疎川澤之消長不常郡縣之廢置無定或一山
而更數名或一水而分數道九河之迹至漢已湮
三江之稱訖明未定泥古則廢今信今則疑古此
其難者二也莫要於班固之地理志而史家但以

爲記載之書不知其條綱正目州次部居約而不失之疎也莫詳於酈道元之水經注而文士但以爲蒼萃之書不知其沿波討瀾窮端竟委瑣而不失之雜也昔之釋禹貢者二孔之注疏蔡氏之集傳皆立於學官蔡氏因陋就簡無所發明僅以資科舉之業而已安國傳頗多牴牾先儒皆以爲魏晉間人依託非西漢筆也是書摘孔蔡之謬不少而採班酈之善爲多至於百家之說折衷紛紜要於一是譬則大川細流支分派別疏而引之使歸墟赴壑而後已不然則猶絕港斷潢之不相通溝澮行潦之無所本方覩經流之大而爽然自失何

待望北海若而始回旋其面目哉世儒高談性命忽於實學易不主象占禮不考器數詩不詳鳥獸草木而禹貢一書保殘守缺承訛襲謬者殆千百年得是書而闡發之其有功於經學也大矣宜乎宸翰親褒一字榮於華袞也夫巖棲谷隱之士冥心孤詣搜抉奇奧欲以自成一書而聲施後世者代不乏人然往往篇斷句落散軼而不存誠不遇其時乎抑亦非漁仲所謂深於道者也渭素志淡泊氣專而容寂庶幾其有道者年踰七十視聽不衰其著述藏橐尚多異日儻更有所獻振裕尚能執筆而敘之康熙四十四年夏五月

經筵講官禮部尚書吉水李振裕撰

臣會恩先世恒爲士自高祖友信以明隆慶間進士起家爲順德令政績茂著粵人至今尸祝而文章爲世所宗與歸太僕有光齊名嗣後科第蟬聯

臣父前進士給事中麒生今

誥贈兵部左侍郎者其文章亦饒有家法太學生胡渭

臣父之再從弟而臣會恩同高祖之叔父也叔祖

前甲子舉人公角即世叔渭以孤童攻制義苦心

鑽研寒暑不輟臣父夙器之謂其技必售命臣從

講肄受業焉已而淹滯不偶遂棄去帖括銳意經術而尤精於尚書就尚書中又以爲周書較備而夏商之書亡逸過半其禹貢洪範二篇乃大禹箕

子所作文字最古與堯典伯仲真瑚璉之法勅東
序之祕寶因博採諸家斷以己意爲禹貢錐指洪
範正論若干卷以發揮禹箕之蘊奧使二代將墜
之緒鬱而復明亦猶夫子取夏時坤乾之志也洪
範未脫藁禹貢已有成書鋟以問世

上方表章六經

內廷燕閒問當世有潛心經學著述可傳者否侍講學
士臣查昇以禹貢錐指進

上覽而嘉之問年籍對曰浙江人六十餘歲禮部侍郎
胡會恩之叔也及

法駕南巡叔感

九重特達之知恭詣

行宮獻平成頌一篇

臣昇取以奏

御

上賞其文許賜扁額且

命宣

臣與叔同至

行在南書房

臣

跪奏

臣

叔胡渭係

臣

受業之師潛心

經學二十年所著有禹貢錐指一部已經奏

御蒙

恩宣至

上悅中使傳

旨云渭所敎出者人才如此其學固可知也有頃中使